

康熙版《黃縣志》

黃縣志略

黃縣志，關中任公輯，凡十卷，及今四十年。紀載無聞，人物散失。即我國家生聚教養、海濫山陬，莫不暨訖應垂之邑乘，以見聖君賢相經綸之盛。而仍以舊帙塞責，幾謂官此地者有秦無人之嗟矣！予以庚戌之冬來守茲土，凋蔽流亡，撫綏周張，亦時念及而未遑也。癸丑春奉詔天下咸修郡邑志。予乃潔清公署，延邑紳及庠子弟，繕遺稿，輯舊聞，進邑之耆老，公論巷議。每一冊成，與同官豫章蕭子介菴、關中姚子瑞石暨學博張子龍弼，商確參酌，凡八閱月，三易稿而成書，得八卷，鳩工剞劂將竣，予因弁言於首曰：

休哉我清之治也，於黃志一徵矣！讀賦役，而見畫一之徵也；讀戶口，而見生齒之繁也；讀驛遞，而知馬卒之飽騰也；讀節孝，而知風教之廣洽也；讀人物，而知升造之優異也；讀藝文，而見邑之安阜無勞怨之聲也。休哉！非志曷傳，非志曷永耶！然斗大一城，僻在海濱，而與名邑等，亦有邑志之不及載者。有四美，即為四累。予偶舉之以補斯志之缺乎！黃地四平，呼應最靈，民之逋賦絕少，美矣！然以急公為性，而人鮮蓋藏，追呼之下，子母之利，徒飽市猾也，累一；黃為登萊通衢，使客皆東道焉。自東徂西，彌望皆膏田，加以林木森蔚，儼然一富庶鄉，美矣！而瀕海之地，鹵圻百餘里，南山之下多石，田不可耕，累二；登州八屬，惟黃產木，民間養生送死為極便，器用之具，貿遷他州，美矣！然種樹之計，必須十年，民間每舍沃壤以藝植，公家興作，必取辦於黃。而輸木之夫非市木之人，累三；黃地狹人稠，有田者不數家，家不數畝，養生者惟貿易為計，而婦女尤勤紡織，美矣！然一遭儉歲，粟必行三四百里，則癡重難致，而逃亡者多，累四。

不僅此也，而其宜亟議者有五焉：

黃縣城垣修整，濠塹深浚，誠巨鎮也。城內居民鮮少，地皆右族園林，今天下晏如，民皆散居關外，設當多警之日，將置民城外乎誰與守？將驅民入城乎誰為居？未雨綢繆可不計乎？則塵肆宜復也。

黃有四都，萊則極小，積合都而不及別都之一大社，乾、盧、平中亦有小社不及大社之一甲；大者便安而拘成例，小者怨苦而多流亡，則社、甲宜均也。

家有塾，黨有庠，所以化民也。而黃自世家而外，讀書者少，以故少年皆呼盧博塞，比戶咸尚鬼疑神。尤其甚者，以財為婚娶，同族而雀鼠，則風尚宜更也。

名重南楚，材表東吳，淳于、太史非猶是山海間氣乎？嗣是而登臺垣、躋公輔，代有人焉。近者黃之庠士，恒產極少，株守者嗟黃齋之不繼，便捷者逐什一以謀生，固多醇謹，亦見佻達，則士習宜端也。

往者登為要地，士馬如雲，加以海運通道，商旅如歸，以故黃四門集市之外，尤設鄉集四，而定稅額，歲為成規。今商販寥落矣，在冊之例不可遽減，而散行稅於居民，查雜稅於土產。則稅課宜減也。

他如狐丘、銅穴、花絨、弓面，雖非土產，而載在上貢，皆官此者知其略，思有以補救之而未能。予因而志其畧於篇端。倘采風君子覽而念諸，則黃之有志可與陳詩例矣。康熙癸丑冬月時知黃縣事蜀人李蕃撰

修志姓氏

原中書科瑞鳴范廷鳳

原任濟南德平縣訓導佐之王輔國

原任河南羅川縣知縣玉書戚延錫

見任廣東高要縣知縣心一鄒衍泗

見任廣東按察司經歷篤初王敦善

辛卯舉人丹林王聯桂

癸卯舉人麟生王世瑞

監生文伯戚延裔

貢生華林范澄倫

貢生文洲王名教編次

廩生王先派屬草

王寶樹參訂

呂璜刪正

增生范廷麟考異

附生王飈言繕錄

生馬子麟監鋟

謄寫王法唐

鐫刊鄭錦

劉珍

鄭鏞

劉秦

馬雲驤

劉永慧

辦事里長王慶

張洪範

柳顯金

徐同升

附修城樓鄉約劉志相

李鳳龍

李魁英

王文星

王進修

曲成名

鮑國治

朱雲魁

董希賢

王好新

高龍飛

周騰芳

於滕虎

黃縣志目錄

一卷圖考疆域志

星野圖（附考）
海島圖
山川圖
萊蘆圖
邑境圖
城池圖
縣治圖
學宮圖
沿革
山水（附古跡陵墓）
疆里
都社

二卷建置志

城池
縣治
屬署（附倉圍）
學校（附學田）
壇廟寺觀
墩舖坊表

三卷賦籍志

地畝
稅糧
戶口
徭役
驛傳
物產

四卷典制志

儀仗
祭品
武備

五卷職官志

尹尉
學博
闔屬
名宦
卓異（附祠碑）

六卷人物志

薦辟
鄉舉
甲科
歲貢（附准貢例監）
鄉賢
封贈（附恩蔭武職）
節孝
行誼
仙釋

七卷紀述志

風俗
祥瑞
災異
軍旅

八卷藝文志

詩
辯
記
文
銘
疏
揭
序
跋

黃縣志卷之一

蜀中錫征李蕃訂
豫章介菴蕭文炳參
陶丘龍弼張彥士校
關中瑞石姚天麟閱
圖考志

河洛肇象，厥有圖形。方輿星羅，乃詳稽考，無考則淆。必案譜如列眉，斯乾坤若指掌。稽黃邑輿列東齊，野分虛危，閔島則桑岵竦峙於北濱，觀山則萊盧環繞於南鄙，一望而知為古奧區也。景物間殊，山川不改，為志圖考。

（圖略）

星野考

黃，古青州之域，分野於齊。按《周禮注疏》云：元枵為齊。文《漢志》曰：齊地，虛危之分野也。《隋書》曰：正東曰青州。其在天官，自須女八度，至十五度，為元枵。以辰為子，齊之分野。《天文志》曰：齊國人虛六度。《唐天文》曰：須女虛危，元枵也。初須女五度餘二千三百七十四秒，中虛九度，終危十二度。東漢陳卓分宿度，所入以東萊入虛危九度則是。黃之分野，在元枵虛危

之交。

沿革

虞夏為嵎夷青州地。周萊子國。漢始置黃縣，隸青州部東萊郡。東漢隸東萊郡光州。晉隸東萊郡。南北朝劉宋隸東萊郡。元魏割隸東牟郡。北齊隸長廣郡。并弦入黃，隋隸青州部東萊郡，唐隸河南道登州東牟郡。神龍四年，徙黃之蓬萊鎮，置蓬萊縣，為登州治。先天元年，複徙蓬萊之黃冠村，別置黃縣，即東黃城。開元十一年，徙東黃城為今治（相傳為黃草關地，舊志以今治為黃冠村，非是）。宋隸京東東路萊州，後改隸山東東路登州。金隸山東路登州，元隸山東東西道般陽路總管府。明吳元年，大將軍徐達、副將常遇春下益都，招撫登萊耆老，鮑起敬等率眾歸附，廢般陽路，置萊州府，轄登州。洪武九年，升登州為府，隸山東布政使司，黃屬登州府。俱為黃縣（按府舊志，太史王言云先天元年析蓬萊黃冠村，別置黃縣；而本縣舊志及碑悉稱，開元十一年徙黃城之舊縣為今治，則是今治自黃冠村而徙於此者，安得以此為黃冠村也）。

山水

黃山：邑西南六十里，在招遠界內，因壤地相望，驛名取此。

蹲犬山：西南三十里，大姑河發源之處。三齊記曰：山似犬蹲，上有石神，俗名狗兒山。漢劉寵出西都過此，山犬吠之，寵曰：山神謂我入也。隋亂，左孝友聚眾十萬，屯東萊蹲犬山。張須陁討平之。備載通鑒。

王榆山：東南三十里。相傳有王姓者始種榆於此。

廬山：西南二十五里。建延真宮，乃廬童飛升處。見古跡志山色蒼巖，水光冷沁，春松濕翠，秋柿赭紅，仙跡點綴，神會駢集，為一邑之勝觀。禱雨有應，見藝文志。

義門山：西南二十里。相傳有王姓者居此，三世不異產，故名。

龍山：西南十五里，形如龍頭。龍山驛名本此。石壁有鐫字，苔蘚斑剝不可辨。

馬嶺：東南十五里，俗名馬嶺溝。

貴嶺：西南十五里，俗名黃縣嶺，下有靈源觀。

黑山：南四十里，招遠界。

鳳凰山：南三十里，形如鳳喙，一名鳳嘴山。

土山：東南四十里，山環如城，有仙岩石，深闊丈餘，可蔽風雨。

石門山：東南三十里，兩山對峙如門。

萊山：一名萊陰山，縣南二十里，廣輿記稱仙靈宅窟。秦皇東封八主，此為月主。又封禪書雲：齊人祀萊山為月主，即此。中有延光月主真君祠，郡邑伏臘走祀不絕。雨旱誠禱，屢應。迤西有真定禪寺，翠巘雲嵐，禪棲精舍，黃邑清幽之境，先達多誦習於此。

丫角山：東南二十里，形如丫角。

絳山：東南二十里，絳水河發源於此。廣輿記載絳闕仙都即此。

磨山：東南十五里，石可作磨春。

渠山：東南十里。

蔚陽山：東二十里，芝山之陽。昔有淳于園林，松竹蓊蔚，牡丹千本，為大東巨觀。舊屬黃，今屬蓬萊，與黃接壤，下有尉遲敬德廟。

平山：東北十五里，山勢平坦。

桑島：北二十五里抵海岸，又水路四十里至島。其中多山桑，有石田可耕。春夏

之交，鰭翅搖紅，蜃樓市幻。按，海魚有名鰭者，長或一二十丈，或七八十丈。或三五成群，順流而下，噴浪如雪，翅浮水面，如百千赤幟。舟遇之即速避，稍遲即為所吞，故俗名吞船鰭。人不敢取。間有自斃，潮至沙灘者，土人以柱撐口入內，割其肉為膏油燃燈，不可食。利刀數割即為油膩沾滯。骨大，可作橋梁屋材，島中有魚骨廟。考輿圖天下有三大幻景：雷州布鼓、酆都杖條、登州海市是也。

乾山：西北二十里。

岵岵島：西北二十里，抵海岸有一線沙路，約二十里，可通於島。四面皆海水淤田茅屋，亦萊人作牧之地。相傳為明勛臣牧馬場。

海：距縣北二十里，北通遼左、朝鮮，南接淮海，西抵三山、天津，東望澎湃無涯。見疆域、建置志。海口八處邑人春仲捕魚海邊。鹽場共一百三十五處，灶戶煮鹽納課，鹽運分司。

界河：西六十里，招遠地界也，發源黃山北分水嶺，繇黃山館西入海。

界首河：西四十五里，發源黃山，繇馬停寨入海。

南樂河：西二十里，發源林家口，合潁門河入海。

潁門河：發源於招遠羅山，經流縣西十里，合南樂河入海。舊志一名永文河。

莊頭河：發源平山，繇苗家莊入東黃河。

呂疇河：發源魯基山，繇馬停鎮入海。

隋家疇河：發源蹲犬山，繇白沙入海。

黃水河：東十里，發源於樓霞蠶山，經黃河口入海。

絳水河：發源絳山，經流縣東門外，合黃水入海。

龍灣：北五里，碧澄不涸，萍藻穿浮。中產鯽魚，一名粉腸魚，腸白色。剖魚取置案上，蠕動如蜿蜒。

陽溝：東北十五里，長渠蜿蜒，為邑中泄水之所。

唐家洞，西南三十五里，在牛心行下，巖洞玲瓏內有流泉涓涓不絕稱邑境福地。

附古跡

士鄉城：邑西北十里。《漢書》“越有君子里，齊有士鄉城。”即此。昔士人多避亂此中，絃誦不絕，禮讓相先。通志稱：山東有學者之風。

古城：縣北關外，今惟頽垣數尺，一帶環繞存焉。議者建築樓臺林木於上，士庶富貴綿延，未知然否。

徐鄉城：西南五十里，漢為徐鄉縣，屬青州部東萊郡。武帝封膠東共王子為徐鄉侯，至東漢省入黃境。

石城山：一名芝陰山，南四十里。峰巒峩嶻，高矗雲表，惟西北一徑可通陟。山半三里許有石壘，相傳為攔馬牆。複二三里至山口，為南天門。徑僅一線，其上平闊逶迤，古松清溪，別有洞天。北崖鑿石為春者六，昔人避亂遺跡也。淳于朗、淳于難曾保黃人據守。後紫霞范公隱居於此，構松風亭，今遺跡猶存。

將軍洋：在石城西北麓，下有仙臺庵，殿閣巍峙，儼如畫圖。昔邑紳王鄢陵修築閣亭於此，著有《家山十景詩》。

石鼓：澗西南三十里，石泉寺東，山下有沙土成塊，如拳中虛。搖擊之有聲。

白鶴頂：廬山北嶺。相傳為廬童跨鶴飛升處。

廬童井，廬山觀殿內。相傳廬童從師棲修山中，昧爽起見縞衣女汲此。廬白於師，

命以紅線穿針葛簪婦首。婦驚走入土，掘之，得千歲茯苓。師命煮之，盧竊食，因飛身上升。今井覆於殿中東角。

盧童塔：廬山北嶺一帶。亂石壘成，大小相連。相傳盧食茯苓，師旋趕逐。盧飛身此山，師逐緩，則築一塔；逐急，則築二三塔。今尚存。

迎仙洞：臨廬山西澗，紫霞范公築。

黑虎洞：萊山院中，禪師棲養處。傳有二黑虎蹲伏洞口。

黑虎泉，在萊山寺黑虎洞前。石下源泉南流繞寺門西，形如滿月，長盈弗溢，味清冽，掬飲甚甘。

聖水泉，東南三里，有廣禪侯祠，祠前有石竇泉流湧出如趺突泉狀：甘潔異常，雖大旱水溢騰湧，居民獲灌溉之利。

萊子城：東南二十五里，古萊子國，地名龍門，其山峽之間斷石通道，極為險隘，俗名萊子關，又名龍門山。《左傳》：齊人伐萊，萊使正輿子賄夙沙衛，以索馬牛皆百，齊師乃還。即此。其後齊復入萊，遷萊子於郕，在國之東，故曰東萊。地今去本縣十里，基址尚存。一名歸城，取萊子歸附之義。居人多以石灰為業，訛名灰城。

中郎城：縣之東。郡國志石勒遣中郎將石開築此城，以防海寇。

東黃城：東二十五里，即舊黃縣。

大入城：東北二十里。魏司馬懿伐新羅，築此城貯糧。

參駕幢：東五里。相傳唐太宗東征，父老見駕處。

蝴蝶溝：在古城東。每五月五日、六月六日，百色蝴蝶飛舞竟日。

寶華臺：東二里許，舊金華宮西北，今併金華宮俱廢無跡。

叢翠亭：東二里。金章宗姑十二公主建隱士樂仲璋故宅也，今廢。

岫巉碑亭，即禹遇蒼水使者，所授金簡玉字也。有衡州岫巉峰，又傳在衡山縣密雲峰下。昔樵人魯見，自後無有見者。宋嘉定中，蜀人何政子因樵子引至其地，以紙榻出，刻於夔門觀中，一刻於嶽麓書院。明嘉靖中，蜀升庵先生模刻於雲南安寧州法華山。今康熙癸丑縣令李蕃刻石，立於縣學尊經閣前，置亭曰岫巉亭。蕃按：唐崔融詩云：於鑠大禹，顯允天德，龍畫傍分，螺書扁刻。劉禹錫詩云：古石琅玕姿，秘文龍虎形。言禹碑字形也。何翥詩云：鳥書蟲文不可識，如讀岫巉神禹碑。雖未詠岫巉亦以見碑字之不易識。蕃於蘄水理仲王公（蜀令）所見榻本七十七字，字畫不可辨。因檢升庵楊先生文集，乃得其文曰：

“承帝曰嗟翼輔佐卿水處（一本作洲渚）與登鳥獸之門參身洪流而（一本無而字）明發爾興久旅忘家宿嶽麓庭智營形折心罔不（一本作弗）辰往求平定華嶽泰衡宗疏事哀勞餘伸裡鬱塞昏徙南瀆衍亨衣制食備萬國其寧竄舞永奔。”

竊幸以為識古字矣，及按輿地志載江西廬山紫霄峰下石室有禹刻篆文，好事摹之，亦七十餘字，止有“洪荒漾予乃攢”六字可辨，與集載不合，心竊疑之。壬子之秋，蕃因闡事如濟南道次長山，見壁間有墨刻碑記，與蕃所見無異。而其下系以今文曰：

“承帝令襲翼為援弼欽塗陸登島瀉端鄉邑仔麓流船暗歇遲眠即夙訖冬次嶽麓
𡱒陌裂（上升下山）折（呂月呂）教罔墮躔往求出竅華恒泰衡嵩陞事哀
獻桴挺裡鬱𤃒墊從南（上口下恭）幅員節別界聯魑魅夔魍竄舞蒸彝”

自蝌蚪蟲魚變而大篆，而小篆，而隸，而八分，時代既異，識之者，難其人也。如一禹碑也，而互異者如斯。果孰真孰偽耶？抑俱為偽耶？世必有博雅君子刻之於石，以俟知者。𡱒音田（呂月呂）音教

月陽橋：在西關龍山驛西，通飲馬灣入河。每歲元宵，士女必踏遊過此。
紫陽橋與月陽橋相去數武，通高家溝東北會馬渠河。
陵墓（黃在海濱，無帝王陵寢，境內丘墳屹立相望。或為古萊子國子孫。其塋地也今不可考，姑即舊志之載者刻於左）
淳于髡墓，東北二十里。
康王墓，西南二十里。按武帝有康王，又戰國宋康王，皆於黃無與焉。或曰即齊康王之誤。又舊邑志有八王墓，北二十里；苗光儀墓，北十里，俱無所考。
楊元帥墓，西二里。
解柱國墓，北五里（名德斐見寓賢萬曆末里人犁得墓誌石）。
遇珍墓，北五里。
鄭將軍墓在西十里土鄉城。
王尚書名時中諭塋城在西北一里許。
誥封范太保閣老祖塋，在城西南隅半里許。
范閣老諭塋在城東蔚陽山，二十里許。

疆里

按邑境形勝。高山踞其前，大海繞其後（見元志），層巒遠抱乎萊絳疊嶂，並峙於龍麓。桑島橫乎其北，絳水出乎其南（見縣舊志碑）。東至柞楊鋪（俗名諸由店）二十里蓬萊界。東南至石良集二十里棲霞界。南至黑山四十里招遠界。西南至界溝三十里招遠界。西至黃山館界河六十里招遠界。西北至岫岵島二十里海岸。北至桑島一帶海口二十五里，通旅順遼東界。東北至黃河寨二十里海岸。蓬萊界至本府六十里。西北至盛京一千八百里。南至江寧一千八百里。大抵南北狹隘僅五十里。依山傍海，半系斥鹵沙礫。東西稍闊，約八十里。西路汙沙。鄰城四圍，一線沃土，煙村湊密，地窄民貧。

都社

乾山都：在縣治西北十里。取乾山為名，領社十二，今並為九社。

王馬社（崇禎十二年並入官莊社）

黃山館社

官莊社

故現社

馬停社

午塔社（崇禎十二年並入馬停社）

仁化社（嘉靖十一年並入東北隅社）

白沙社

北馬社

北梧桐社

高王社

小杜莊社

廬山都：在縣治西南三十里，取廬山為名，領社十二，今並為十一社。

七疇社

楊官莊社

曲馬莊社

諸羊社
埠下社
橫埠社
南梧桐社
諸高社

張家疇社（崇禎十二年並入橫埠社）

位莊社
南樂社
呂家口社

萊山都：在縣治東南二十五里，取萊山為名，領社十二。

韓戰莊社
東石良社
豐義社
西石良社
文基社
黑山社
渠山社
東黃水社
唐家埠社
藍曲社
歐頭社
良馬莊社

平山都，在縣治東北十五里，取平山為名，領社十四，今並為十二社。

上莊社
逢曲社

諸由社
義樂社

康家莊社（順治十年並入諸由社）

孫家疇社
小河口社
徐官莊社
李家莊社
冶基社
北呂社

江陵社（嘉靖十一年並入北呂社）

西南隅社
東北隅社

登屯社（原屬登州衛屯，順治十六年歸附黃縣，為登屯社，入平山都，共十三社）
按黃舊四十八社，江陵、仁化、午塔在海濱。嘉靖間海風颶沙，平地成埠，而三社之地，淪沒無存。土人以為海怪揚沙，堆積成埠。舊令薛大中命鑄巨釘鎮之而稍止。年來冬春之交，北風肆起，冶基一甲房舍俱沒。如馬停白沙等社濱海者多不得收穫，稍植雜樹，僅取禦風，而又恐成材後官府有征租之擾。康熙十年知縣李蕃親至其地，詢知民情，勸令各照，邊地栽植給以免租照貼，為日後計深遠也。至於萊都社在南山中，前此山寇倡亂，民多流亡，而東黃水、東石良、韓戰莊、

唐家埠，社社荼毒尤甚。知縣李蕃巡鄉至此，見廢址荒園，荊榛滿目，乃召集還定，略給牛種。十一年審編，每社實在只存百十餘丁。有不及百丁者，羸億萬狀，思議為並社之請，尚未逮也。

附集場

東關集（逢九）

西關集（逢五）

南關集（逢七）

北關集（逢三）

舊城集四街，明末改在四關，遂不可複。然揆之城市之義，根本之謀，仍以入城為是。

鎮店

北馬集（西三十里）

黃山館集（西六十里）

石良集（東二十里）

黃城集（東二十里。各有常期，見風俗志）

黃縣志卷之二

建置志

城池

邑舊有軍民二城，建於東黃城。唐開元十一年，徙今治，一統志作北齊徙此。洪武五年守禦所千戶韋勝因遼闊難守，割去北之半用南半修築此城。周圍八百四十二丈，高二丈四尺。甕門樓堞粗備。池闊二丈四八，深八尺，十一年革千戶所。正德十一年，知縣周淳因絳河山水侵城東北隅，退數武為月城，下作水門泄水。嘉靖二十二年，知縣賈璋重修。因土半夾沙，屢年淋雨傾圮，修補為勞。萬曆二十二年，知縣張彙選因倭寇朝鮮創，砌以石，極其堅備。增高三丈三尺，上闊二丈五尺，下闊三丈。磚垛一千二百六個。磚甕四門，東曰寅賓，南曰環翠，西曰迎宣，北曰澄清。重樓四座，西北二門甕城各一，東南二門敵臺各一座。角樓五座，窩鋪小懸樓一十六座。崇禎十三年，邑紳內閣範複粹題准知縣任中麟增繕城垣，比舊周圍各增三尺，共高三丈五尺，項底加厚，增建四角敵臺四座，沿城敵臺十座。南門甕城一座，曰“朝陽”（因俗名鳳城）。東門甕城一座，曰光表。敵樓十座，窩鋪三十四座，炮樓共九座，改建東北、西北角樓二座，重修四門樓並磚垛（共垛六百六十六個）。壕，千戶韋勝原鑿，深八八，闊二丈四尺。知縣張彙選深共一丈五尺，增馬路牆。知縣任中麟重，共深二丈，闊三四丈，吊橋馬牆一切堅完。曆清初康熙六年地震，門樓俱壞。今康熙十一年，知縣李蕃重修四門樓，池濠，泉水流通。

縣治舊在北城，洪武元年，知縣彭舉徙建於南城。德政坊，今之西街，大堂五間，明敞者三。東一為東庫房，西一為西庫房，堂東為鑾駕庫，舊在堂西，知縣王志禹改建於此。再東為幕廳，西為贊治廳，今廢。知縣王志禹改鑾駕庫為拜祝龍亭之日臨政處。迤東之北折為縣丞衙，南折為典史衙。迤西之北折為主簿衙，今廢，南折為馬神廟，知縣王志禹徙於龍山驛，今複徙於主簿廢衙。堂東為吏、戶、禮房架閣庫羈候倉，堂西為兵、刑、工房承發司重祀，監內有獄神廟。知縣賈璋建

堂正南月臺甬道。舊有戒石亭，知縣賈璋建，久廢。新建戒石坊一座，北面書：“爾俸爾祿，民膏民脂。下民易虐，上天難欺。”南面書：“澤流保障”。崇禎十年知縣任中麟創立。迤南為儀門三間，東西兩角門。門外坐櫃收糧房各三間。迤內南向為衙神廟三間，嘉靖十三年，知縣程顯建。迤東為三門，北折為寅賓館三間，知縣任宗湯修建，扁名“兩瑞堂”，有石碑記麥秀兩岐之瑞，知縣王志禹改名曰“請益堂”。兵火後知縣任中麟重建，題名“集思廣益”。南為大門三間，門外東支房三間，舊有申明亭二座，知縣蕭來鳳建，知縣王作重修。大堂後為二堂三間，舊有堂逼近堂簷，知縣湯啟業移建宅內。天啟六年，知縣張所性重建。今堂內轉為知縣宅，正廳五間，住房二層各五間，層列廂房。正廳東折南向為書房三間，知縣賈璋建，題“化工書院”扁，今無存。迤前門房三間，迤後西向書房三間，即知縣湯啟業撤後堂屋材迎養處。三堂，知縣李蕃建，扁題“憶堂”（有記見藝文）。高樓一座，扁名“環翠”（有詩見藝文）。川堂二間，西川堂二間（空三字）知（空八字）康熙七年縣丞蕭文炳新建大堂三間，扁題“慎勤堂”。三門大堂以次建立，至康熙十年重修二堂三間，三堂三間，書房二間，廚房、內書房、兩廂房共五間。園栽花果數株（有記見藝文）。第四層五間，縣丞安有年修。典史宅在縣治正東，衙宇年久欹側。順治十七年，典史姚天麟修大堂三間，犬門、二門並東、西皂隸房，堂題“天日時凜”。康熙十一年重修二堂四間，住房三間，廚房、耳房、書房共七間（有記見藝文）。

屬署

儒學：在北街東轉。

巡檢司：舊在縣西四十里馬停社地方。洪武三十一年移於白沙社地方，因名“白沙巡檢司”，今廢。

龍山馬驛：在縣西關。縣丞楊祖順建，縣丞馬珍增建鼓樓，今廢。

黃山館驛：縣西六十里。洪武九年，縣丞楊祖順建。崇禎五年兵火毀，知縣任中麟重建。

僧會司：在普安寺。

道會司：在馬神廟。

陰陽學：在縣西。

儒學射圃：在預備倉西，教諭蕭如尹置建，因兵火殘壞。崇禎十二年，知縣任中麟重修。今僅存遺址。

官倉：在縣儀門外東，洪武二十一年知縣劉福建，收儲官俸軍糧，今廢。

預備倉：在布政使西，知縣劉福建。

火藥局：在預備倉後。坐東向西，正房三間，廂房各三間，中庭三間，大門一座。崇禎十二年知縣任中麟創建。今遺址存焉。

儒學倉：在明倫堂東，收貯師生俸廩。今廢。

養濟院：在南街東巷，歲養孤貧五十丁口於內。

察院：在西街縣治東。

布政分司：在北街西轉縣後。正統間，改縣府館為分司。嘉靖九年，知縣蕭來鳳徙建於此，知縣賈璋、任中麟重修。

按察司：舊名府館，原在北城下。知縣張所性改建布政西司。

河濱書院：東門外，知縣賈璋建，今廢為慧燈庵。

黃河寨：東北二十里，系河口極衝，唐時建。弘治五年，知縣劉淵重修。崇禎十年，知縣任中麟重建石城。舊有營房三十六間，今廢。墩臺十二座，名見《建置一墩鋪志》。

學校

學宮：在縣治東北。肇建於唐之開元，廢於金之貞祐，再構於元之中統。至元間，遇昭武、孔文貞繼修。大德三年，縣尹王英增建。至大二年，主簿李延壽購廣學地，增置廬舍。洪武三年，知縣侯冕、教諭史慶重修。正統中，知府楊鐸命縣官增建兩廡。弘治九年知縣劉淵、嘉靖元年知縣張弁、十三年知縣程顯、二十二年知縣賈璋重修。萬曆二十二年知縣張彙選重修先師殿一座，東廡十楹，西廡十楹。前為戟門，門東為名宦祠，祠前西向為更衣亭，西為鄉賢祠。祠前東向為省牲所，俱知縣張彙選改建。前為櫺星門，內有泮池一泓，石橋石檻，知縣曹燧鑿建，知縣王俊英議毀。門外南為屏牆，西為“文風大振”坊，知縣王俊英重修。東為魁星樓，知縣張彙選創建。殿後明倫堂五間，東廂崇德齋，西廂徙義齋，堂後敬一亭三間，內藏石刻《明世宗敬一箴》《程子四勿箴》，亭圯壞已久。今康熙十二年，知縣李蕃重修尊經閣，樓高三丈，東西三丈四尺，南北一丈八尺。堂前西折為訓道宅，知縣張彙選建。東折南向為啟聖祠，祠後為教諭宅，俱知縣張彙選建。南出為儒學門，直南為雲路，南通北街東巷，舊無雲程，知縣杜時騰買民房基肇開。崇禎五年，廟遭兵火，邑紳前禦史范複粹捐銀百兩倡修，其兄儒官範複元督工。知縣任中麟捐資重修教諭宅住房三間，廂房四間，署教諭蕭如尹增建住房四間，今廢。順治十二年，聖殿曆久傾圮。知縣崔萬仞、縣丞安有年、同邑人大學士范複粹及闔學生員李國標、王取善等輸資重修。啟聖宮傾圮無存，范複粹撤屋材重建之，曆康熙二年，聖殿遭火，知縣王作捐俸百金、典史姚天麟捐俸二十金、鄉紳戚良宰、范廷鳳及闔學生員王名教等公輸錢穀、義民王爾征督工重建，備極壯麗。其名宦、鄉賢祠各三間，日久傾廢者一併建。複於三月鳩工，五月落成，見碑志。訓道齋房傾廢無存，至僦居民舍。知縣王作每慨然念之。康熙四年，訓導泗水杜燦然延闔學諸生王名教等捐資建復復齋房三層各三間。康熙十二年，戟門曆久傾圮。知縣李蕃捐俸重修，議同訓導張彥士倡率闔學蠲吉鳩工，月半落成，高閣整新，見碑文。尊經閣，知縣李蕃建（有記見藝文）。

附考

考稽周敬王四十二年，魯哀公誅孔子為尼父。唐太宗陞為先賢，貞觀以前，周公為先聖，孔子配享。至是從房元齡議，罷周公，尊孔子為先聖。宋加封至聖文宣王，四配為公，十哲為侯，兩廡為伯。元加大成。嘉靖九年從張璁議，改正稱至聖先師孔子，四配稱復，宗述亞聖，餘為先賢。從祀者俱為先儒。撤州縣樂舞，府仍舊。撤塑像，先師木主朱地金書，四配以下赤地墨書。黃庠遵立木主，因塑像不忍毀，至今仍舊。其兩廡從祀，正申梈中黨之重，複增后倉、王通、歐陽修、胡瑗四人；罷公寮、秦冉、顏何、荀沈、戴聖、賈逵、馬融、劉向、何休、王肅、王弼、杜預、吳澄十三人；林放、遽瑗、鄭重、盧直、鄭元、虞服、范甯七人各祀於其鄉，附載以便正。儒學廩膳生員二十名，增廣生員二十名。康熙十一年廩增附學生員共二百八十三名，附武生六十四名。

附學田

舊伍百捌拾捌畝零，歲收穀貳拾石零。知府陶朗先萬曆四十四年置地壹百貳拾畝，歲收穀貳拾肆石。共地柒百捌畝零，歲收穀肆拾肆石零。以上見府志。新置學田貳拾陸畝柒分，歲租穀陸石陸鬥玖升三合。康熙九年，知縣李蕃到任，百姓紛紛具告學田納租半系有租無地。隨力行清查，至康熙十一年，查確現存上中下三等共實在學田捌百伍拾三畝陸分玖厘陸毫，歲租穀伍拾石貳斗柒升壹合柒勺，易銀壹拾伍兩肆錢貳分玖厘壹毫捌絲柒忽貳微，解交督學道轉解，大部充餉。

壇廟寺觀

風雲雷雨山川壇：城南半里，洪武三年知縣彭舉建，弘治五年知縣劉淵重修。壇制高三尺，方圓五丈。石柱長二尺五寸，方一尺。南北十七丈，東西二十丈五尺。社稷壇：城西北一里。壇制、壇宇、壇垣俱與南壇同。

邑厲壇，城北一里。壇高三尺，方圓六丈二尺，壇宇有神廚頒降祭文碑一座。壇垣南北十三丈，東西十三丈貳尺。

里社壇：每社立一壇，以行春祈秋報之禮，今廢。

里厲壇：每社一壇，祭無祀鬼魂，今廢。

文廟：在城北街東轉。

城隍廟：在城東街。

玉皇廟：東南五里，玉皇埠之巔，名玉皇頂，為一邑主山也，堪輿家議建高塔於上，為筆峰，科甲蟬聯。近被土人取石成塹，急需護培。

玉皇閣：一在東關，一在西關。

泰山行宮：境內甚多（城內天齊廟在東街，宮殿森嚴，古柏蓊鬱，歲修祀焉）。

文昌閣：城東南角樓。萬曆二十二年，知縣張彙選創建於儒學之西，邑人封監察禦史范從簡移建於此。

魁星樓：在文廟東，知縣張彙選創建。

關聖帝廟：境內甚眾。

萊山月主祠：東南二十里，萊山之麓。行宮一在南關，一在東三里泉水疇，一在西二十五里。

真武廟：一在北門樓，一在西三十里，一在城北李家疇。

三官廟：一在南關，一在北關，境內甚多。

火德廟：在北關。舊在城南樓，因屢旱，知縣李秋移建。

張仙廟：在東北月牙城樓。後經傾圮，庠生唐發早重修。

昭惠顯靈真君廟：西關北轉，俗稱二聖廟，又名二郎廟。

吳客三靈侯廟：西關北轉西巷。

龍王廟：一在崑崙島，一在城東樓。

廣禪侯祠：東三里泉水疇。

王伯當廟：西南十五里，石泉寺之山陰半坳，廟甚隘陋。土人禱雨稔多靈應。中有古樹，枝幹梢拙。相傳為茶樹。當，李密捋也，唐兵追密至此，當以身蔽密，遂遇害。土人義之，為立廟。墓在山下。

普安寺：在城儒學東，拜龍亭習儀處。

萊山寺：萊山之曲。有四景：古洞朝陽、清泉漱石、松山岼翠、蓮池毓秀。賜額“真定禪寺”，見《萊山志》。

海晏寺：縣西五里，僧妙湛創建。

義樂院：東五里。

文基院：東南二十里。

石泉寺：西南二十五里。中有四景：東郊石鼓、西澗泉流、南對虛空、北倚太瑚。

玉泉寺：西南三十里。

海雲寺：西北二十里。

寶塔寺：東北二十五里，唐建古剎。

法源庵：東北十五里，康熙年間僧性玉創建。

觀音閣：在西城樓，崇禎十年知縣任中麟移建。

觀音堂：一在北關，一在李博士疇，一在西關南巷，境內甚多。

七疋庵：西南三十里。

將軍洋仙臺庵：西南三十五里。

潛唐庵：東南四十里。

真乙觀：東北十五里。

慧燈庵，在東關泮水河崖。

潮音庵，在城北街東巷。萬曆四十八年，累封恭人李門范氏創建。

白衣庵，在北街東巷，街民李大福建。

延真宮，在廬山之陽，即廬童升仙之所。隋曰“升天觀”，唐曰“仙君觀”，宋僖寧間，郡守李良輔因歲旱屢禱有應，疏請封號“廬仙”，曰“沖禧真君”，賜額曰“延真宮”。見《廬山志》。

祥光宮：西南四十里。

靈源觀：西南十五里。

忠節祠：在北關。

墩鋪

界河墩，西六十里。

呼家墩，西五十五里。

界首墩，西四十五里。

馬停口墩，西四十里。

龍口墩，西四十里。

仁化墩，西北四十里。

白沙墩，西北四十里。

鹽場墩，西北二十五里。

榆林墩，西北二十里。

呂口墩，西北二十里。

西皋墩，西北十八里。

天尊墩，北十八里。

黃河墩，東北二十里。

王回墩，東北二十里。

小河口墩，東北廿里。

新設河口墩，西六十里。

按：寨城墩臺俱明洪武三十一年魏國公徐輝祖建，俱隸登州衛者，今衛歸並於黃，遂為黃轄之。

總鋪舊在西關內，其關外為楊官鋪。

十里鋪，西十里。

南樂鋪，西二十里。

北馬鋪，西三十里。

官莊鋪，西四十里。

界首鋪，西五十里。

黃山館鋪，西六十里。

南王鋪，東北十里。

作羊鋪，東北二十里（俗名諸由鋪）。

坊表

繼科坊，西街，為舉人胡鏞立。
鐘秀坊，西街，為舉人張翀立。
進士坊，北街，為進士王綱立。
恩榮坊，為郎中張倫立。
世科坊，為進士張倫立。
登科坊，為舉人張倫立。
經魁坊，為舉人趙珩立。
進士坊，為進士王時中立。
進士坊，為進士姜閎立。
父子進士坊，為進士知縣張、巡撫張子立建。
豸史坊，為禦史王三聘立。
鯤海先騰坊，為舉人王時中立。
龍門雙躍坊，為舉人王時正立。
大司馬坊，為兵部尚書王時中立。
地垣都諫坊，為戶科都給事中王繼光立。
青重褒坊，為封戶科都給事中王守默立。
祖孫濟美坊，為尚書王時中、巡撫王繼光立。
誥封坊，為贈僉都禦史王鑽立。
獨持風紀坊，為禦史林文英立。
四世甲科坊，為張輝、張倫、張諧、張名藩立。
龍門聯躍坊，為進士張名藩立。
攀龍坊，為進士姜閎立。
貞烈坊二，
一為生員王之棟妻吳氏立，
一為生員姜朝梧妻田氏立。
義民坊（為輸粟義民王旭立）。
忠節坊二，
一為死節生員之妻立。
一為死節街民之妻立（坊未建，舊志未載姓名）。
太史遺風，東十里。
淳于故里，東二十里。
萊嶽具瞻，二十里東交界。
古土鄉城，西十里。
盧仙勝跡。西二十里。
皇華駐節，西三十里。
麻姑仙里，西四十里。
徐侯封境，西五十里。
黃山巨鎮，西六十里。
東牟首邑，界河東崖。

黃縣志卷之三

丁地賦役
地畝

崇禎間，三等共地叁千捌百肆拾捌頃玖拾柒畝壹分。續被水衝沙壓，至國初順治年間，止存一例共地叁千陸百貳拾陸頃伍拾壹畝捌分，內於康熙三年奉旨遷移桑島人民除豁島田地玖百陸拾捌畝伍厘陸毫外實存並開墾。至十一年，見任三等折成一例成熟行差地叁千柒百柒拾陸頃貳拾壹畝捌分玖厘貳毫。

○額外原額並開墾荒田地貳百陸頃肆拾伍畝壹分叁厘柒毫，另立徵解。至康熙三年，歸入丁地起解。

○順治十六年，奉裁登州衛歸併本縣境內，三等折成並開墾一例成熟屯地肆拾壹頃貳拾伍畝柒分陸厘叁毫伍絲，另立徵解。至康熙三年歸入丁地起解。

按舊志：嘉靖二十四年，官民地共叁千玖百陸拾陸頃捌拾肆畝柒分玖厘叁毫，內抄沒官地捌頃伍畝捌分貳厘、官地壹拾叁頃柒拾畝柒分玖厘、民地叁千玖百肆拾頃貳拾貳畝壹分捌厘貳毫，見邑舊志。

○萬曆四十六年，官民共地叁千肆拾捌頃玖拾柒畝壹分叁厘玖毫，見府志。

附農桑

嘉靖二十四年，官民桑陸萬肆百壹拾壹株。官民棗貳百叁萬貳千捌百壹拾貳株，見邑舊志。

崇禎十一年，桑棗共拾萬株，知縣任中麟栽植，見給徭冊。

康熙十年春，知縣李蕃勸諭栽植報冊存房寢致蔚茂。

戶口

崇禎間，共丁貳萬壹千捌百壹拾丁。人民續被災傷，至國初順治年間，共丁壹萬柒千伍百壹拾捌丁，內於康熙三年奉旨遷移島民，除豁島丁一丁外，實存并新增人丁。之內每有下中戶，則大為民累，富者以之貧，貧者因之逃。至康熙十一年，知縣李蕃編番，壹槩以下下一例行差實在人丁壹萬捌千貳百壹拾陸丁。

○順治拾陸年，奉裁登州衛歸併一例屯丁伍拾叁丁，至康熙三年，歸入丁地起解。

○匠戶實在貳百拾陸名。

○灶戶實在壹百名。

按舊志，洪武三十四年，人丁捌千肆百肆拾丁。

○永樂年人丁陸千壹百肆拾捌丁。

○正統七年，人丁陸千貳百叁拾丁。

○成化十八年，人丁陸千貳百叁拾丁。

○正德元年，人丁陸千肆百伍拾玖丁。

○嘉靖二十年，人丁陸千伍百叁拾丁。俱見黃邑舊志。

○萬曆四十八年，人丁陸千伍百肆拾貳丁，見府志。

○原匠戶壹百貳拾陸名。

○原灶戶壹百叁拾名。

稅糧

夏稅秋糧，絲綿農桑折絹存留、麥米馬草、塩鈔京庫等倉銀兩，俱於康熙三年俱歸入丁地字樣起解。并無撒倉名色。

本縣丁地，共徵銀貳萬叁千玖百捌拾陸兩壹錢捌分玖厘柒毫肆絲捌忽貳微陸纖陸沙。內：

○丁地起運銀壹萬捌千肆百肆拾柒兩玖錢肆分柒厘叁毫貳絲陸忽壹微柒纖肆沙。

○丁地腳價銀柒拾肆兩肆錢柒分陸厘貳毫肆絲捌微玖纖。

○戶部本色供用庫：本色黃蠟壹百玖拾捌觔貳兩伍錢貳分貳厘貳毫叁忽壹微柒纖，并腳價共銀貳拾玖兩玖錢肆分捌厘伍毫捌絲壹纖。

○甲字庫本色光粉叁佰壹拾玖觔柒兩伍錢玖厘貳毫壹絲捌忽，並鋪墊腳價共銀時

價共銀柒拾肆兩叁錢伍分玖厘陸毫捌絲叁微伍纖柒沙。

○丙字庫本色錦花絨陸捌拾壹兩陸錢柒分柒厘陸毫壹絲貳忽，並鋪墊腳價共銀伍錢肆分貳厘壹毫伍絲陸忽柒微捌纖。

○禮部本色藥材蒼朮叁捌拾兩壹錢貳分伍厘並時價包裹紙價共銀叁錢柒分捌厘陸毫伍絲伍忽陸微貳纖伍沙。

○工部本色狐皮壹百貳張肆分壹厘並腳價共銀伍拾壹兩伍錢捌分陸厘肆毫肆絲捌微捌纖。

○牛角弓面拾玖副叁分柒厘柒毫銀伍拾捌兩壹錢捌分壹毫伍絲伍忽捌微捌纖。

○德州倉無麥納米折色銀連加銀腳價共銀捌百陸拾兩壹錢壹分陸厘肆毫柒絲玖忽陸微貳纖。

○官俸役食銀壹千柒百玖拾叁兩陸分肆兩陸絲。

○龍黃二驛驛站銀貳千叁百伍拾柒兩玖錢叁分叁厘叁毫。

○雜支銀壹百玖拾肆兩叁錢捌分柒厘捌毫三絲伍忽捌纖。

○節年起科丁地銀叁拾叁兩貳錢柒分貳厘肆毫柒絲貳忽玖微柒纖。

現在僱役

本府正堂馬快玖名、步快貳名、庫子壹名、禁子貳名。

本府倉斗級貳名。

府學膳夫叁名。

本縣守城民壯陸拾名，今經制伍拾名，九舖司兵共叁拾陸名。

本縣正堂門子貳名，皂隸拾陸名，馬快捌名，陸房書辦拾壹名，倉庫書貳名，轎夫肆名。

縣丞門子壹名，皂隸肆名，馬夫壹名。

典史門子壹名，皂隸肆名，馬夫壹名。

文廟大殿門子壹名（即掃殿夫）。

儒學膳夫貳名。

訓導齋夫三名，門子壹名。

現在力役

里長（每社壹名）；甲頭（每甲壹名）；六房司典吏（今缺）；六房書辦；門子；三級庫夫；快手；民壯；皂隸；陰醫僧道；在城鄉約；申明亭老人；教讀；本鐸；禁子；捕狀；吹手；陰陽生；農民；衣生；社書；保正副；舖司；地方；燈夫；兵夫；轎夫；火夫；更夫。

□差即僱役，力差即力役，蠲免即免役法也，銀力均有利病。宋蘇文忠、司馬溫公已辯之詳矣。今時雖殊異，而力差之害為甚。前朝革大戶櫃頭鑄碑百世永利也。

驛傳

龍黃二驛夫馬數目。

自崇禎年間，龍山驛原額馬捌匹、半驢柒頭，貳拾家應當共草料銀陸百肆拾叁兩；夫叁拾玖名，陸拾家應當共工食銀叁百玖拾兩、支銷銀肆拾兩。黃山館驛原額馬玖匹、半驢陸頭半，貳拾家應當共草料銀柒百捌兩伍錢；夫肆拾捌名，陸拾家應當共工食銀肆百捌拾兩、支銷銀壹百兩。二驛共銀貳千叁百陸拾壹兩伍錢。本縣編銀壹百捌拾兩，餘銀在於招、棲、萊、寧四州縣編解。本府協濟后改本縣百尺崕、威海二倉抵兌支領。又奉旨增加二驛銀壹千柒百肆拾玖兩肆錢零。本縣青夫貳拾名，共工食銀壹百陸拾兩。黃山館青夫捌名，共工食銀貳拾肆兩。本縣條編，里甲馬拾肆匹，共銀貳百捌拾兩，驢伍頭共銀伍拾兩。崇禎間知縣任中麟念驛遞苦累，馬歸官養，遂為例初。